



Virus Chikungunya ta ataca mas tanto e articulacionnan y ta crea inmunidad

ORANJESTAD (AAN) – Docter Wilmer Salazar, miembro di e Management Team di Departamento di Salubridad Publico, a referi na e sintomanan di e virus Chikungunya y su diferencia cu Dengue, den conferencia di prensa, diahuebs mainta.

Dr. Salazar a reitera cu e virus aki ta transmiti pa Aedes Aegyptis, cu nos conoce hopi bon na Aruba, como causante di Dengue.

E diferencia entre Dengue y Chikungunya ta cu e ultimo aki ta afecta mas tanto e articulacionnan y cu e ta un malesa autolimita. Esaki

ta nifica cu tin un periodo di cinco pa siete dia cu e persona lo tin e virus den dje.

“E sintomanan ta cuminsa casi mescos cu Dengue. Na prome lugar keintura halto (39.9 grado, calofrio, dolor di musculo, dolor di weso, sacamento of gana di saca, y mas relevante ta un rash cu ta aparece dos of tres dia despues cu e keintura cuminsa y dolor di articulacionnan, tanto asina cu e persona casi no por cana, y cu por tarda pa desaparece di varios dia te hasta un aña”.

Dr. Salazar a splica kico e termino Chikungunya ta nifica.

Den e idioma Africano e ta nifica “cana manera macaco” pasobra e dolor ta asina intenso cu e persona ta cana hopi dobla.

E dolor ta ataca mas tanto e puls, rudia, y enkel cu por bira artritis.

E virus aki no ta causa hemoragia, ni complicacionnan severo. Personanan mas vulnerable ta esnan di sesenta plus, y por tin su consecuencianan riba dje y tin menos riesgo di morto, compara cu dengue. Ocasionalmente Chikungunya por causa inflamacion di cerebro (meningitis), inflamacion di curazon (miocarditis), pero mas tanto e ta afecta articulacionnan.

E persona por sufri fatiga cronico, di manera cu e no kier lanta ni cana, y ta sinti su mes hopi, hopi malo. Incluso e persona cu haya ta keda immune, kiermen e no ta haya e infeccion mas biaha, manera si por sosode cu Dengue. Dr. Salazar a subraya si, cu un persona por haya Dengue y Chikungunya hunto. Tratamento ta sintomatico. No tin un tratamiento specifico como tampoco un vacuna contra dje, sino tratamiento pa keintura, sacamento y/of dolor di articulacionnan. Si un persona tin sacamento y keintura hopi halto mester tuma hopi likido pa evita deshidratacion.